

Maart 9, 2020

www.awemainta.com

www.facebook.com/awemainta

noticia@awemainta.com

583-1400



AWEMainta

DAMA FAMOSO DI “PATRUYA 37” RIBA PARANDA A CAUSA ACCIDENTE BURACHI

DIADOMINGO mainta pasa di 11:00am a sosode un accidente den cercania di rotonde di ex-Drive Inn na Kibaima. Ora cu Polis di Trafico a yega n’e sitio, a detene e dama Latino, kende t’e chauffeur cu a causa e accidente. E tabata bebi y riba un trip cu un amiga y un amigo mas.

Polisnan a hib’e Warda di Polis na Shaba pa mas investigacion y interrogacion. Durante investigacion a resulta cu tur esnan den e auto ta stranhero y no por a prueba cu nan tin un status legal riba nos isla. Cu e realidad aki riba mesa, Polis a dicidi di detene tur tres y hiba nan Warda di Polis pa mas investigacion y verificacion.

Warda nos Costa lo sigui e proceso pa confirma nan status riba e isla, debi cu nan tin aceso n’e data di DIMAS.

Segun fuente, e dama deteni cu a causa e accidente t’e mesun dama cu a bira famoso den e caso di “Patruya 37” na Noord, ora cu un video di dje y un amiga papiando cu dos Polis a causa nan suspension te awe ainda. E biaha aki e ta den noticia cu foto y tur, pero deteni pa causa accidente burachi.

Despues di interrogacion y cu ningun di 3 por a demostra di tin documento cu nan ta legal, a dicidi di hiba tur 3 pa Warda nos Costa, unda nan lo keda deteni pendiente nan deportacion.





**INVEST
SECURE**


We don't just say it ... We Guarantee it !!!



24 Years

*Nos ta ofrece tranquilidad,
protehando nos comunidad.*

Pa mas informacion yama 582-7252



Market Leader of Business Software in the Caribbean

= exact

Solutions for:

- Finance
- Wholesale Distribution
- Professional Services
- HRM, CRM and BPM

VCC
International NV

*Supports All Your
Business Activities & Processes!*

Tel. 583-7072 | info@vcc-int.com | www.vcc-int.com

Huez na asesino:

“Mi ta tumabo na malo cu bo a laga dos mucha chikito sin nan mama”

DIABIERNA mainta Corte a dicta sentencia den e caso penal contra e homber Aurelio Dirksz. E homber, kende a choca su ex pareha mata aña pasa den luna di april. Fiscal a pidi un castigo di 14 aña y na final el a haya dos aña menos. Acusado tabata den Corte y tambe famia di e victima Natasha Kock. E sesion di sentencia tabata basta cortico.

E Magistrado a splica e acusado pakico e no ta haya e prome acusacion presenta dor di Fiscal, asesinato premedita, no proba. Y cu e di dos acusacion asesinato intencional si proba pa cual hecho e lo wordo condena. E abogado di e acusado a papia cu su cliente no a actua intencional den e caso aki, un ponencia cu Huez a rechasa.

El a bisa cu “den e raport psiquiatrico ta para cu e acusado tabata completamente bon na su tino. E tabata sa kico e tabata haci”.

Raport di Patologo ta bisa cu el a choca e señora cu hopi forza y pa un periodo largo. E prueba di esaki ta cu su yiu muher a trata di kita su man, pero no a logra. Tur e tempo e tabata chocando e señora. Despues e menor a rogue pa laga su mama los y e no a haci esey mesora tampoco. Pues, Huez ta bisa, ta basta rato a pasa, mientras cu e tabatin e mannan na garganta di su ex pareha.



Tambe ta prueba e plekinan blauw cu a keda na ambos banda di garganta di e victima.

“Loke cu bo a haci ta un delito hopi serio mes. Mi ta tumabo hopi na malo cu esaki a tuma lugar den presencia di bo yiunan y bo a laga bo dos yiunan chikito sin nan mama,” Huez a bisa e acusado mirando e acusado den su cara.

A base di tur esaki y e hecho tambe cu nunca antes el a wordo condena, a dicidi di castigu’e na 12 aña di prison, cu ta dos menos cu loke Fiscal a demanda.

Un parti di e demanda financiero di famia di e victima tambe a keda otorga,

CASO

Aurelio Dirksz a presenta dilanti mesa berde p’e hecho aki cu a tuma lugar dia 23 di april, 2019. El a bira jalors despues cu el a mira su ex pareha y mama di su yiunan ta combersa un rato cu un amigo. El a laga e amigo bay pa despues drenta e kamber.

Eynan a start un discusion, unda el a perde y a cuminsa choca e muher. El a bay for di e sitio, bisando su yiu cu a presencia tur cos, pa yama un tanta di dje dies minuut despues bisand’e cu “bo mama a cay flauw”.

E sentencia cu Aurelio Dirksz a haya ta dos menos cu loke Fiscal a pidi.



Ricibi AWE Mainta tur dia den bo Inbox

Registra awo!
Manda bo e-mail na
noticia@awemainta.com



GRATIS



EDITORIAL

Presupuesto 2020 aproba prome cu Parlamento a trata esaki



Pa: Victor (Toko) Winklaar

PARLAMENTO mester t'e organo legislativo mas halto di nos pais y sin duda e institucion aki ta para riba Gobierno y tin como tarea principal, fuera di prepara y aproba leynan necesario pa sirbi interes general, di hiba un control estricto riba maneho di Gobierno.

Un control cu en realidad ta confirma cu Parlamento ta Hefe di Gobierno, sigur ora cu miembronan di Parlamento, ta wordo considera y mester fungi como representantenan di pueblo y actua na prome lugar como representantenan leal na pueblo y no na Gobierno.

Na momento cu e actual Parlamento a huramenta pa sirbi interes di pueblo, a wordo segura pa principalmente esnan cu ta sostene Gabinete Wever Croes, c'un era nobo a yega, cu pueblo lo conoce un Parlamento cu ta traha na sirbi interes di pueblo y no esun di Gobierno. Hasta Prome Minister Evelyn Wever Croes y Presidente di Parlamento, sr. Ady Thijsen a declara n'e momento ey, cu porfin pueblo di Aruba lo bay haya un parlamento di nivel, caminda lo implementa reglanan existente y lo cambia e forma di funciona di Parlamento.

Sinembargo tur e fanfaria aki a resulta net lo contrario ya cu na lugar cu pueblo realmente tin hendenan cu ta lucha pa interes di pueblo, a surgi un situacion caminda practicamente Gobierno ta dirigiendo Parlamento, ta Gobierno ta dicidi ki dia y ki ora por yama cierto reunion y hasta con resultado di e reunionnan aki mester bira.

Prueba di e dominio di Gabinete Wever Croes riba su tres fraccionnan den Parlamento a surgi na momento cu e 12 miembronan cu tabata sostene Gobierno, a dicidi durante di tratamiento di ley di LAFT, pa presente y aproba un amienda, caminda ta duna Parlamento tur autoridad pa atende y aproba presupuesto di e pais y dunando e Comision di Supervision Financiero, esta CFT, un rol menos dominante y caminda Parlamento ta keda esun cu tin e 'final say' den henter e proceso aki.

Loke a pasa despues ta bay pa historia politico di nos pais, caminda c'un ley aproba cu mayoria di Parlamento, ta wordo secuestra, manipula y hasta poni den lachi, ya cu e amienda aproba no ta cumbini Gabinete Wever Croes.

Riba dje e contenido ta liña recta contra palabracionnan oficial haci entre Gobierno di Aruba y Gobierno di Reino, caminda ta duna CFT tur poder pa bira e institucion cu ta analisa y practicamente aproba presupuesto di pais Aruba.

A bay asina ley cu Gobierno di Reino practicamente a obliga Prome Minister di Aruba di duna un declaracion publico den cual e ta confirma cu e amienda aproba of mihor bisa henter e concepto di ley di LAFT aproba, lo no wordo ehecuta y consecuentemente esaki lo wordo destrui.

Esaki tabata un momento pa Parlamento di nos pais, lanta para y exige mas respet for di tanto Gobierno di Aruba y Gobierno di Hulanda, pero esaki no a sosode te dia di awe, pues e era nobo cu tanto a wordo priminti, simplemente nunca a bira algo real.

A bin acerca cu e tres fraccionnan cu a aproba e amienda aki, nunca mas a manda yama Gobierno bin Parlamento pa duna cuenta y a trata esaki 'binnenkamers' sinta na mes cu Gobierno pa haya un splicacion di con Gobierno, of mihor bisa Prome Minister, no a respeta e decision di su Hefe cu ta Parlamento.

Parlamento siman cu a pasa a ricibi e concepto di presupuesto 2020, no completo, pero a haya suficiente pa haci pregunta necesario na Gobierno prome cu inicia cu tratamiento oficial di e presupuesto aki cu por bira dificil ya cu mester ta sigur si tur 11 miembro cu ta sostene Gobierno, ta na Aruba.

Sinembargo henter e proceso aki tambe ta birando un asunto caminda ta bolbe lanta e duda kico realmente e rol di Parlamento mester ta, ya cu como organo cu ta controla Gobierno, ta dificil pa kere cu mesun miembronan aki ta bay prensa y elogia e presupuesto, elogia cu Gobierno a logra un surplus y cuestiona Gobierno anterior y oposicion, cu si tin nan dudanan riba henter e presupuesto aki.

Ta bin acerca cu tanto CFT como oposicion y tambe Gobierno mes pa medio di tanto Minister Presidente como Minister di Finansa, a mostra cu tin un serie di medida na caminda, cu varios tipo di impuesto nobo ya cu e surplus cu Gobierno ta papia di dje, ta bira posibel solamente si e medidanan aki drenta na vigor.

Mientras cu esaki ta un hecho caba, sigur anuncia pa Prome Minister Evelyn Wever Croes siman pasa, e representantenan di pueblo cu ta sostene Gobierno a bin dilanti den conferencianan di prensa, cu atencion total riba nan oposicion, cuestionando cierto remarca y uno cu den pasado a traha duro contra CFT, cu segun su opinion ta atachando e derecho legal di Parlamento, awor ta elogiando cierto expresion di e Comision di Supervision Financiero aki.

Ta un hecho cu mientras cu Parlamento tin un poder grandi riba Gobierno y cualkier otro instancia, esnan cu ta yama pa ehecuta e poder aki ta permiti nan mes wordo uza como marionetanan di Gobierno, bayendo asina ley na cuminsa propaganda un presupuesto 2020 cu ta colma di medida contra di pueblo.

Esnan cua bay prensa caba duna declaracion ningun momento a papia di aumento di roomtax, deviezenprovisie of BBO na frontera caminda ta nan obligacion di lanta brinda pa pueblo como representantenan di pueblo, pero no ta haci esaki.

En realidad tratamiento di presupuesto 2020 tin cu bira un simpel 'hamerstuk' caminda lo spaar placa, lo evita oranan largo di discusionnan politico, ya cu e propio miembronan di Parlamento cu ta sostene Gobierno, practicamente a bisa caba cu nan ta di acuerdo cu esaki.

Pues e momento cu Aruba lo conoce un mentalidad nobo den Parlamento, no a yega ainda y no ta na bista por lo pronto y pueblo tin cu spera pa e proximo Parlamento huramenta pa mira si realmente representantenan di pueblo, ta representantenan di pueblo 100%!

Tin masha duda cu presupuesto lo keda trata prome cu proximo fin di luna

PRESUPUESTO porfin a keda entrega, y a duna Parlamento 10 dia pa keda cla cu e preguntanan. Di acuerdo cu CFT y Gobierno di Reino, e deseo ta pa fin di luna awor, e presupuesto keda trata. Pero si mira e situacion actual den Parlamento, fin varios factor cu tin duda cu e presupuesto por keda trata.

Laga nos cuminsa cu e situacion den Parlamento mes, unda aworaki e partidonan cu ta forma coalicion no tin mayoria. Ricardo Croes, pa motibonan priva y di urgencia mester a biaha pa exterior.

Te ki dia ta spera Ricardo Croes bek, no ta conoci.

Banda di esaki, Parlamento tin reunion di Parlatino pa atende y tin hopi miembro cu no kier perde oportunidad di haci e biahe aki, Pa no bisa cu e preparacion cu Parlamento tin cu haci p'e proximo IPKO, cu lo tuma lugar proximamente.

Pesey, mirando tur esaki, tin duda cu Parlamento lo por keda cla cu tratamiento di presupuesto 2020.

Auto a pega candela cu dama chauffeur tras di stuur



TABATA algun minuut prome cu 2'or di merdia caminda cu un dama chauffeur tabata manehando un Range Rover color preto riba e caminda di Santa Marta. Den careda algo a bay fout; no ta conoci kico por a causa cu e Rover preto numera A-34500 a pega candela.

Daño material tabata basta, e parti dilanti di e auto a kima por completo. Hood, luz y motor por bisa cu a kima casi por completo. Parti paden a keda manera un buskuchi di soda, asiento, dashboard y mucho mas a ricibi daño. E Rover ta un modelo basta antigua. E dama chauffeur no tabata herida.



Diesdos luna pidi pa traficacion di hende contra dos Venezolano



E dos hombernan Venezolano Carlos Refunjol y Xavier Medina, di Venezuela, ta core e riesgo di haya dos aña di prizon pa e delito di traficacion di hende. Aki dos siman lo tin sentencia den nan caso.

E dos hombernan aki pa 200 dollar a riesgo no solamente nan bida pero tambe di dies otro Venezolano, kendenan a paga cierto suma pa trece nan na Aruba y baha nan na costa pariba di Aruba. Un area unda lama ta hopi bruto y unda ya caba mas cu dos persona a yega di perde nan bida den transcurso di tempo, pero cu no a evita cu e transportenan ilegal pa Aruba ta sigui tuma luga. Y esaki tabata un di nan.

Dia 2 di november, 2019, Carlos y Xavier tabata manobra un boto mucho chikito pa 12 hende riba dje, direccion pa Aruba. Abordo tabatin 10 persona cu a pone nan bida na peligro pa yega e isla. Na peligro, segun fiscal a splica, pasobra no a tene cuenta cu aspectonan di seguridad. E boto no tabatin radio abordo y no tabatin iluminacion. Hasta OM ta duda cu tabatin “life vest” abordo. E acusado Xavier a sigura Hues cu cada pasahero tabatin un chaleco bisti y cu esaki bisti a baha nan na Santana di Cacho. Esnan cu conoce e area aki por bisa cu di dia mes, e ta duna “kippevel”, corda den scuridad monstruoso di anochi.

E marduga ey a baha tur hende y mesora a bira pa coy rumbo bek pa Venezuela, pero Warda Costa tabata riba lama e momento ey y a señala un nave sospechoso sin iluminacion.

Mesora a cuminsa sigui e boto y a cuminsa ordena nan pa para. No a logra y e persecucion a sigui, saliendo di awanan teritorial di Aruba y dado momento, personal di Warda Costa a saca arma pa tira prome den laira y despues riba e motor unda obligatoriamente e boto a para.

Na Polis y den Corte, Carlos (Capitan) a splica cu nan no a para y pensa solamente pa yega Venezuela, pasobra a pensa cu piratanan tabata persigui nan.

Nan a splica tambe cu e biahe aki ta wordo regla pa un homber cu yama Roberto, kende ta cobra e pasaheronan entre 200 pa 350 dollar pa e biahe. Ta Roberto ta esun cu a acerca nan pa realisa e biahe aki a cambio di pago. Ambos a splica cu nan tabata den necesidad di placa pa cual a acepta e job aki, cu ta prome biaha nan a haci. Den e boto, nan a bisa, tabatin dies salbida cu e hendenan a bisti for di momento cu e biahe a cuminsa. Pero si nan ta admiti cu e boto no tabatin iluminacion.

Fiscal a bisa e acusadonan, cu pa Ministerio Publico ta legalmente proba e acusacion di traficacion di hende. Nan mes a admiti algun cos, manera e falta di iluminacion y sistema di nabegacion y e hecho cu nan a haya pago pa trece e hendenan aki scondi Aruba y pa nan drenta di forma ilegal.

E traficacion ta algo cu autoridadnan a bin ta luchando conrta dje, sin resultado positivo. Tur esaki debi na e situacion reinante na Venezuela, cu hendenan tratando pa yega y gana poco placa den e circulo ilegal na Aruba, prome cu descubri y deporta nan atrobe. Tur esaki ta un peso pa Aruba.

Mirando e hecho, a pidi 12 luna di castigo pa cada un di nan.

. Fiscal a sigui bisa cu traficacion di hende ta sosode hopi na Aruba. Door di e situacion na Venezuela, hendenan ta busca manera pa bin Aruba pa haya trabao. Ademas di hende, tin contrabanda di arma y droga. E hendenan ilegal ta bin Aruba y ta traha ilegal y ta keda den e circuito ilegal. Esaki ta causa hopi presion pa Aruba. Fiscal a exigi 12 luna di prison y cu e boto ta keda confisca.

Dia 20 di maarti pa 8.15 di mainta lo tin sentencia.

Cacho a morde ciudadano malamente



DIAHUEBS den oranan di atardi, tur cos a cuminsa na momento cu un cacho di rasa Shisu Tzu a sali pafo, e doño mesora a bay tras di su cacho. Na momento cu e dama a gara su cacho, pa su sorpresa for di cura di un bisiña a sali un cacho grandi, cu mesora a ataca e Shisu Tzu, ela lastra e cacho indefenso bay cun'e.

E dama hopi lihe a sali na defensa di su cacho, na momento cu e tabata luchando pa salba bida di su cacho, un otro cacho brabo a sali for di e cura di cas. E dosnan aki a cuminsa morde e dama, nan a benta e dama a abou, despues di un rato a sali un di tres cacho for di e cura cu tambe a bay ataca e dama.

E dama yen dolor tabata grita pa auxilio, un cabayero cu a scucha con e dama tabata grita, mesora a sali bay yud'e, el a core e tres cachonan aki, pa asina scapa e dama y su cacho di mas mordi.



E dama a haya basta mordi for di e tres cachonan aki, el a wordo malamente mordi na su brasa, su pecho y diferente otro parti di curpa. E cacho chikito tambe a haya varios mordi.

E dama mester a bay hospital pa tratamento medico, mientras su cacho a keda interna na veterinario, pa motibo di e mordinan cu ambos a ricibi.

Polis a presenta pero segun nan, nan no por haci nada contra e cachonan aki, paso nan ta bek den nan cura di cas. Un cos si e gastonan ta gigantesco y esaki ta core riba cuenta di e doño di e e tres cachonan brabo aki. E cura di e cas no ta cera bon y e cachonan ta djis pushe un poco y sali for di dje.

E cachonan aki mester ta bon cera den cura halto y cu portanan sigur, no por laganan den un cura habri, cu nan por bay riba caya, paso un hende grandi mes nan a morde asina, ta kiko ta mayan si nan gara un mucha chikito.

BO MESTER DI WASTE BUCKET RESIDENCIAL OF COMERCIAL?

ecotech GROUP

YAMA

Mr. Bucket

594-3757
mrbucket@ecotech.aw

20 yrd Big Bucket

15 yrd Junior Bucket

10 yrd Small Bucket

Minister Chris Romero ta ratifica su decision di December 2019:

Vehiculonan RHD no ta permiti mas pa core cu plachi TX, T, O, B, V y MFV



DEN luna di December 2019, e Titular di e cartera di Transporte, sr. Chris Romero, a anuncia su decision pa no permiti pa vehiculonan conoci como Right Hand Drive (RHD), core como Taxi (TX), Tour (T), Ongeregeldvervoer (O), Bus (B), Verhuurauto (V) y Motorfietsvervoer (MFV). E decision aki a keda tuma basa riba diferente factor crucial, cual esun principal ta e siguridad di e pasaheronan cu subi un un vehiculo di transporte publico cu ta RHD.

Ta asina cu for di algun tempo caba companianan di seguro na Aruba a cuminsa avisa cu nan no lo sigui sigura vehiculonan tipo RHD cu ta destina pa duna un servicio comercial. Tambe for di diferente instancia ta sali diferente ponencia di cual por conclui cu un vehiculo di transporte publico cu ta RHD, por pone e usuario su integridad fisico na peliger. Segun Minister Romero a duna di conoce cu “si bo transporta un persona dilanti, ora e baha e ta haci’e band’i caminda y no na banda di acera, cual riba su mes ta un peliger caba. Y como cu mayoria di e usuarionan di transporte publico na Aruba ta turista, nos tin di pensa pa proteha nos turismo pasobra si algo pasa den e indole aki, e lo bira un mal propaganda internacional pa nos pais”.

Lo bay tin un fase transitorio pa esnan cu actualmente ta haciendo uzo di un vehiculo tipo RHD pa duna servicio di Taxi. E vergunninghouders cu ta haciendo uzo di un vehiculo RHD a wordo poni caba na altura di e decision aki di Minister Romero, y nan ta haya un tempo adecua pa busca un vehiculo cu ta apto pa core riba nos careteranan na Aruba.

Minister Maduro a reuni cu Stephanie Croes y Joylene de Nobrega di e pelicula Huicio Perfecto

SIMAN PASA Minister Xiomara Maduro a reuni cu Stephanie Croes y Joylene de Nobrega di e pelicula ‘Huicio Perfecto.’

Un produccion local di nivel halto graba na Aruba bou direccion di Angelo Croes, filma pa Roy Croes y sonido den man di Martin Buitenweg.

E elenco tambe ta consisti di artistanan local. Diahuebs anochi tabata tin estreno di e pelicula aki na Principal Theater na San Nicolaas. Masha pabien na full e ekipo di ‘Huicio Perfecto.’



Dos chauffeur deteni sin tabata envolvi den accidente cu Polis tabata atende



DIADOMINGO marduga momento cu polisnan tawata tin e rotonde di Tanki Leendert cera, debi cu tawata atendiendo un accidente a haya nan mes ta bay atende cu otro dos vehiculo.

Loke sa sosode varios biaha y esaki a pasa diadomingo marduga tambe ta cu ora tin accidente polis ta cende su zwaailicht y ta pone e auto un manera unda cu trafico no por sigui. E biaha aki dos diferente chauffeur a bay purba nan suerte.

Polisnan tawata bezig cu un brommer cu a accidenta na e rotonde di Tanki Leendert. Prome auto tawata un taxi, un Toyota Prado cu un cabayero na stuur y un dama sinta na banda. E taxista no a worry cu e caminda ta cera y bay pasa toch. Aki ta unda cu polisnan a stop e y a bay atende cun'e y por a mira/hole cu e ta bebi. Agentenan a sigui protocol y laga supla uzando e asina yama Alco-sensor.

Manera nan a sospecha, e taxista a surpasa e limite stipula pa ley y mesora el a wordo bisa su derechonan y a bay over na detene.

Algun minuut despues, tawata un otro auto cu aunke ta mira cu polis tin e caminda cera toch ta purba y/of forsa pasa. Wel, agentenan a bay atende r biaha aki cu un dama chauffeur.

A resulta cu e dama aki tambe tawata coriendo auto bou influencia di alcohol.

Pues e tambe mester a supla y a pasa e limite stipula. Ela wordo deteni y e tambe a wordo hiba warda di Playa.

Tanten cu no bin ley(nan) mas estricto pa chauffeurnan coriendo auto bou influencia(burachi), polisnan lo keda hayanan confronta di dia y anochi cu e hendenan aki.

Cu ta un menasa serio pa otro chauffeurnan inocente ariba caminda.

Minister di Finansa:

Presupuesto 2020 di pais Aruba cu un contenido mas transparente



RECIENTEMENTE Minister Xiomara Maduro acompaña pa e Secretaria di Consejo di Minister sra. Grace Koolman a haci entrega di e Presupuesto di Pais Aruba 2020 na un manera innovativo riba un USB stick di un bara di oro, na Presidente di Parlamento sr. Juan Thijsen den presencia di Griffier di Parlamento sr. Herman Hek.

Presupuesto 2020 a wordo modernisa

Durante di e entrega di e Presupuesto, Minister Maduro a informa cu e contenido di Presupuesto 2020 a conoce cambionan den e manera cu ta presenta e informacion pa asina e Parlamentarionan y otro usuarioan por haya un contenido mas completo y mas transparente. Awor e contenido ta brinda un miho bista entre locual ta ser presupuesta den cada un Ministerio en conexion cu e maneho di cada un Ministerio. Ademas e inclui mas informacion den cada un Ministerio y ta inicia cu e agenda di maneho, sigui pa e prioridadnan di maneho, y tambe e cambionan di maneho den aña 2020.

Hopi importante ta kico e cambio di maneho tin como resultado financiero.

Den e Presupuesto tambe a delinea cu grafico un bista di e debe y e likides di Pais Aruba. Tambe a duna un bista amplio di e gastonan di personal di Gobierno y e subsidionan cu Gobierno ta otorga.

Gabinete Wever-Croes a compromete pa implementa e 17 metanan di desaroyo sostenibel di Nacionnan Uni y a incorpora esakinan den e Presupuesto 2020.

Pa prome biaha a inclui na cada un Ministerio, cual di e 17 metanan sostenibel di Nacionnan Uni, e maneho di e Ministerio lo por cumpli cune. Na momento cu presenta e Cuentanan Anual, Contraloria General por controla cual ta e metanan di e desaroyo sostenibel Gobierno a cumpli cun'e den su maneho.

Minister di Finansa a gradici su coleganan Minister y nan staf, su conseheronan financiero, funcionari-onan di Departamento di Finansa y di Departamento di Legislacion cu a traha inalcanzablemente pa por a entrega e Presupuesto. Tambe e dignatario a gradici staf di Consejo di Minister cu a yuda den e proceso di entrega di Presupuesto.

Proceso

Awor cu e Presupuesto a keda entrega na Parlamento, e miembronan di Parlamento lo studia e Presupuesto. E miembronan di e organo legislativo di nos Pais lo trata e Presupuesto den Comision Central y lo haci pregunta na Gobierno. Despues di ricibi contesta lo bay continua cu e Reunion Publico pa e debate riba Presupuesto 2020.

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta






583-1400



583-1444

Brommer a kibra den dos durante accidente



POLIS tabata pasando riba e caminda di Solito pa Tanki Leendert na altura di Cas Casuela nan a bin nota un brommer y e motociclista no tabata tin helm bisti.

Polis mesora kier a bay atende cu e motociclista, pero esaki na momento cu ela mira e intencion di polis ela hisa velocidad y a bay direccion nort. Polis no a bay core su tras pero Si a sigui bay direccion panort pa si acaso nan acerca e brommer nan por atende cu e motociclista, pero ora nan a yega na e rotonde di Tanki Leendert, nan no a mira e brommer mas.

Ariba e rotonde e polisnan a bin topa cu e brommer, e brommer tabata parti den dos, e motociclista lo a dal cu su brommer riba e rotonde y den e impacto fuerte esaki lo a parti den dos. E motociclista mes no tabata na e sitio mas.

E polisnan na e sitio mesora a pidi cooperacion di nan coleganan pa asina cera e rotonde pa evita cu e trafico pega y tambe a pidi pa presencia di polis di trafico pa haci un investigacion.

Basta rato despues polisnan a haya un melding cu na un cas na Moko, lo a yega un persona cu ta herida y

tabata kehando di dolor, e persona lo a pidi pa yama un ambulance p'e. Na e momento ey polisnan no tabata sigur si ta trata di e motociclista of un otro accidente, pa motibo cu mesora tras di e melding aki a drenta un melding cu un auto lo a cay den Rooi na Saliña, cerca di e dam, polisnan a bay direccion di Saliña pero no a topa cu niun auto den niun Rooi.

Ambulance bay na e cas unda e persona herida tabata ta y na momento cu nan tabata atendiendo e persona aki, nan a bin compronde cu tabata trata di e motociclista cu a accidenta un rato prome riba e rotonde Tanki Leendert.

Mesora polis di trafico a bay na e adres pa asina tuma declaracion y datos di e motociclista. E motociclista enberdad tabata herida y tabata kehando cu su brasa tabata haci hopi dolor.

Despues cu personal di ambulance a trat'e, nan a dicidi di transport'e pa hospital pa un tratamiento medico mas avansa.

Un rato despues famia di e motociclista a bin busca e brommer cu a keda parti den dos riba e rotonde Tanki Leendert.



Chauffeur a core den verboden dilanti Warda di Polis y causa accidente



DIASABRA marduga den careda di 3'or agentenan den warda na Wilhelminastraat a mira con un auto a pasa den verboden, dilanti warda di polis.

E vehiculo aki un Toyota Camry a pasa cu velocidad hopi halto bay pariba.

Mesora polisnan a reacciona y sali bay buske, paso loke e chauffeur a haci ta algo sumamente irresponsabel y peligroso.

Drentando Avenida Milo Croes e Camry a perde control y dal contra un cura di cas na su man drechi, kibrando varios meter di awa. Polisnan cu a yega mesora a detene e chauffeur.

A pidi Transportwagen pa a hiba e chauffeur warda di polis. Take-lwagen y tambe WEB a wordo avisa.

Daño material ta grandi. Despues cu a baha e chauffeur na warda a pidi pa Ambulance, debi cu elo a haya golpi na su cabes y lomba.

Chauffeur burachi deteni na Noord



DIASABRA merdia polis a wordo notifica di un homber basta burachi na un supermercado na Noord. E homber aki lo tawata tin intencion di bay stuur su auto tambe.

Polisnan a bay na e supermercado indica pero no a topa cu e homber, si auto si tawata pafo.

Agentenan a bay paden y a bin topa cu e chauffeur pata pata.

Nan a cuminsa cana cune bay pafo.

Momento cu nan tawata bayendo pafo e homber a cuminsa bira fastioso, polisnan a papia cune pa e calma.

Pero, cada bes e tawata coopera menos y no a keda nada pa bay over na detene. Tur esaki debi cu e tawata asina burachi. A check su papelnan di auto y esakinan no tawata na ordo tampoco.

Segun polisnan a compronde hunto cu e homber aki tawata tin un hende muhe, cu a bay cu e jabi di auto tambe.

Transportwagen a wordo pidi pa bay cu e homber Shaba y tambe takelwagen pa bay cu e auto direccion Balashi.

Nissan Tiida a cay den greppel



DIADOMINGO marduga algo pasa di 4'or polis a wordo informa cu un auto a cay den rooi na Sabana Liber.

Mesora un patruya a cuminsa bay unda e accidente lo a sosode. Na yegada polisnan a topa cu compania di seguro y un Nissan Tiida den e rooi. Segun nos a compronde, na stuur tawata tin un dama Hulandes cu pa un of otro motibo a perde control y bay termina den e rooi. Danki Dios e no a resulta herida. Polis a tuma datos y a continua.

Na ocasion di CEDEHM su 'teambuilding':

Minister Croes ta confirma su apoyo incondicional na CEDEHM, Fundacionnan Pro Lechi Mama y Bon nochí Drumi dushi



NA caminda pa celebracion di Dia di Hende Muhe, e departamento encarga cu Desaroyo y Derecho di Hende Muhe esta CEDEHM, a organisa un mainta di encuentro y empoderacion di su team cu tin e tarea grandi pa keda lucha pa igualdad di genero.

Un bunita iniciativa unda cu di un manera informal a comparti cu otro. Durante e rato ameno aki a intercambia di vision y di opinion. E mandatario a bolbe expresa, cu e aña aki mester bira aña di CEDEHM, un departamento cu a wordo lanta a peticion di Nacionnan Uni. Un departamento cu tin e maneho di porta habri pa tur hende muhe cu ta desea conseho y apoyo den cualkier reto cu nan por ta enfrentando.

Empoderando e propio team di CEDEHM, mientras tanto a muda e departamento aki pa nan localidad nobo, un oficina hogar unda tur hende muhe y por cierto homber tambe por yega pa cualkier topico cu por ta di su preocupacion e momento ey. Bou di e mesun dak aki ta ubica Fundacion Pro Lechi Mama y Bon Nochi, Drumi Dushi cu tambe ta conta cu apoyo incondicional di e mandatario. Tambe CEDEHM ta trahando riba su website ademá di tin un calendario di evento prepara pa 2020 pa empodera e hende muhe. E mandatario a gradici pa e mainta confirmando su apoyo total na CEDEHM y a dispidi cu e reflexion como e unico hende homber presente: "Tur locual cu un hende muhe por, un homber no por!". Un reflexion pa para keto na dje dunando honor y respet na e balor cu nos hende muhe tin refiriendo tambe na e etapa di reconstrucion cu Pais Aruba ta bibando na man di un gran prome minister cu ta Sra. Evelyn Wever Croes ta desplegando un trabou ehemplar.

Minister Glenbert Croes:

Hamas lo lubida tur locual e Soeur y Frèrenan a haci pa Aruba



Minister Glenbert Croes titular di Asunto Social y Labor, desde 2019 ta sea bishitando e Soeurnan cu un tempo a traha na Aruba y cu ainda ta na bida of ta gradiciendo postumamente esunnan cu ya a bay laga nos.

E siman aki e mandatario a bay gradici cu un bunita ofrenda floral, Soeur Dorothea kende tabata e prome cabesante di Kleuterschool Trupial di Santa Cruz, un soeur hopi stima den e barrio aki. Acompaña pa docente- y muchanan di Scol Trupial y Pastor Jairo, a bisa e Soeur aki hopi danki pa tur locual cu el a haci pa nos muchanan y pa e impacto positivo cu e tabatin den nan bida. Durante e ceremonia por a scucha algun testimonio di entre otro un ex alumna cu awe ta docente na dicho scol. E tributo di Pastor Jairo tambe tabata hopi emotivo. A probecha mirando cu den mesun kelder ta sosega Pastor Berlage y Pastor Felix, pa rindi tributo na nan tambe. Pa Pastor Felix a invita un representante di e comunidad Filipino den persona di Sra. Martha Hernandez Jiao pa hunto cu Minister Glenbert Croes haci ofrenda floral.

Despues di Santa Cruz a sigui di biaha pa Parokia di Noord unda ta descansa Soeur Enrica kende a traha pa hopi aña na Imeldahof. E ofrenda y tributo aki tabata hopi emotivo tambe en vista cu Sr. Derwin Kemp, e famoso cantante conoci bou di su nomber artistico “Master Gusto”, a bin pa rindi homenahe na Soeur Enrica kende a cuid’e, cri’e y stim’e masha hopi mes durante su permanencia den Imeldahof.

Confirmando su compromiso, e mandatario a expresa: “Hamas Aruba lo lubida e gran contribucion y amor pa nos Pueblo. Cu un curason agradecido, e Aruba cu nan a crea awe ta bisa nan: Un gran danki pa tur loke boso a haci y significa pa nos comunidad en special nos muchanan”.

Riba portada un resumen visual di dos momento emotivo y impactante unda cu curason agradecido a bisa danki na dos soeur sumamente importante den cuido di nos muchanan.



Minister Xiomara Maduro a ricibi bishita di Fundacion Tur Cos Ta Posibel




SIMAN PASA Minister Maduro a reuni cu sra. Clair Brown kende ta fundadora di e fundacion 'Everything is Possible,' cu ta dirigi riba intercambio riba e tereno di arte y deportivo entre hobennan menos afortuna di Gran Bretaña y varios Pais na mundo, incluso Aruba. Sra. Clair tin 16 aña bishitando Aruba y di e manera aki a dicide di lanta e fundacion 'Tur cos ta posibel' cu e mesun meta, pa hobennan menos afortuna di Aruba tambe haya oportunidad di intercambia cu hobennan di Gran Bretaña y resto di mundo.

E programa ta wordo haci posibel cu fondonan Europeo destina pa hobennan por tin intercambio, por traha trabou voluntario y tambe di vocacion. Na Aruba sra. Brown ta traha hunto cu sr. Freddy Tromp pa intercambio riba tereno di arte y sr. Franklin Priest pa intercambio deportivo. Ya caba riba e tereno deportivo tabata tin un intercambio na unda un coach a bin Aruba pa duna clinica pa e hobennan di Brazil Junior y FC San Nicolaas.

Na april proximo lo tin intercambio riba tereno di arte na unda un grupo di hoben lo biaha pa Gran Bretaña pa por comparti cu hobennan di Cyprus y Gran Bretaña. Minister Maduro ta gradici sra. Brown pa e bunita proyecto aki ta graduci sr. Tromp y sr. Priest pa pone nan tempo disponibel pa e proyecto aki por ta exitoso y di hopi beneficio pa nos hobennan di Aruba.

Exposicion 'Caranan di Oranje' di GN na 'Stadhuis'

STADHUIS DEVENTER
 Grote Kerkhof, 7411 KZ Deventer



'ORANJE EXPOSITIE'
 IN DE CENTRALE HAL
9 MAART TOT 19 MEI 2020
 TIJDENS OPENINGSUREN STADHUIS
'Oranje Gezichten', Vorsten-serie van Gustave Nouel



DEN sala central di 'Stadhuis' na Deventer, di 9 di maart te cu 19 di mei 2020, lo por mira un exposicion special di Gustave Nouel (GN) di 20 pintura y algun objeto. E exposicion titula 'Caranan di Oranje' ta referi na pinturanan cu ta refleha caranan relaciona cu identidad comun di nos Reino soberano. Cu e exposicion aki e pintor di Caribe GN (www.gustavenouel.com / www.gustavenouel.exto.nl) kier subraya cu henter Reino tin unicamente un 'Oranjehuis', aunke e ta consisti di cuater diferente 'Pais'.

Exposicion 'Caranan di Oranje' lo ta habri pa tur hende durante oranan di trabou.

Lo tin diferente actividad y sorpresa, durante y despues di Dia de Rey, relaciona cu e exposicion aki pa refleha e funcion puente di nos Casa Real...

Deventer ta e ciudad caminda e artista Caribeño GN a biba y traha como artista profesional, mayor parti di su bida. Actualmente GN ta guiando artistanan pintor di Deventer di tur nivel na asociacion di artista DAK. Tambe e ta dunando cursonan special pa pinta potret, tanto na DAK como na Kunstcircuit, un di e centronan cultural, di mas grandi y completo di region y posiblemente di Hulanda. (mira: <https://www.kunstcircuit.nl/amateurkunst/zoek-cursus/aanbod/portrettekenen-en-schilderen/>) Den su atelier na Deventer GN ta duna 'masterclass' tambe na artista diplomá y/o hopi avansa for di henter Hulanda.

GN tabatin mas di 200 exposicion rond mundo. Den PALET, e revista di Arte mas grandi di Hulanda, su cursonan di pinta y proyectonan artistico a ser publica. Hunto cu PALET el a organisa diferente biahe di Arte, caminda artistanan di Hulanda, Belgica y Alemania a participa na workshops cu e tabata duna, hunto cu e artistanan local conoci, Edmond Tujeehut y Elvis Tromp.

Na Hulanda, demasiado hende, sa poco o nada di e parti di Reino Caribeño, di nan talento y cultura. Pa e motibo aki GN di Aruba ta pensa cu intercambio cultural - cu igualdad di condicion - por añadi un balor na nos Reino.

Centro Cultural Kunstcircuit, na 2020 kier cuminsa un intercambio cultural cu National Institute of Arts (NIA) na Sint Maarten. Si esaki bira un exito, na 2021 un intercambio cultural structural lo por cuminsa tambe cu otro institutonan cultural di e otro partinan di nos Reino, caminda por inclui tur disciplina di arte relevante.

Damanan di Arubus, Aruparking y Arutram a haya charla pa celebracion di Dia di Hende Muher



PA conmemora e lucha pa igualdad di genero, specialmente di e ser femenino, Arubus NV a organisa un charla pa su empleadanan. A trece hunto e personal femenino cu ta labora tanto na Arubus, pero tambe na Aruparking y Arutram, pa asina comparti un rato ameno, den colegialidad y semper recordando e esen- cia, lucha y perseverancia di e hende muhe den nos bida.





E atardi a cuminsa cu un charla duna pa sra. Nadine Antersijn di Momax Trainings & More, kende a enfoca riba e lucha cu e ser femenino a hiba durante decadan- an pa haya un trato igual den comunidad, y con awen- dia nos por ta testigo di evolucion personal y profe- sional di e hende muhe den tur ambito. Nadine ta un profesional y entrepreneur, cu tin un famia pa atende, y asina mes e ta mantene su negoshi y ta consciente cu su bienestar personal mester keda un prioridad.

Tambe a conta cu presencia di sra. Desline Loefstok, cariñosamente conoci como Dess, kende ta un Make Up & Tattoo Artist profesional, cu na su 29 aña di edad ta doño di su mesun negoshi y na mes momento tin su casa y ta mama di 2 yiu muhe. Dess a comparti su me- sun storia como hende muhe, pero tambe a duna guia di con e ser femenino mester duna tempo na su mes tur dia pa por mantene su mes como e pilar principal di su hogar.

Tabata un atardi sumamente ameno caminda e daman- an di Arubus, Aruparking y Arutram a keda satisfecho di por a experiencia y comparti empoderamiento hunto.



Dalmento riba Green Corridor entre 4 auto y un persona a keda levemente



DIABIerna algo prome cu 4'or di atardi a sosode un accidente riba Green Corridor un poco pariba di Rotonde Drive Inn. E accidente tabata entre 4 auto. Mesora a pidi pa presencia di Polis. Road Service a yega prome n'e sitio y a pidi pa presencia di ambulance pa un persona cu tabata levemente herida y tambe pa Polis di Trafico.

E accidente tabata entre dos Nissan Fairlady, un pickup y un van. Polis di Trafico tabata n'e sitio pa haci mas investigacion, mientras cu na yegada di ambulance, personal di ambulance a haci un checkeo medico cu e persona cu tabata levemente herida. Riba e caminda tabatin zeta basha y esnan cu ta encarga cu Green Corridor a basha tera riba e zeta y a haci e area aki limpi.

No ta cos cu ta sosode tur dia

Ciclista bou influencia a dal cu su bais contra un pal'i luz



DIABIerna den oranan di madruga habitantenan na Hato a mira con un homber riba un bicicleta a bay dal flush contra un pal'i luz, el a dal su cabes hopi duro n'e pal'i luz. E homber a keda benta abou y no lo por a lanta. Mesora e habitantenan a pidi pa presencia di Polis.

Na yegada Polis enberdad a bin topa cu e ciclista benta riba vloer. Mesora e Polisnan n'e sitio a ripara cu e homber aki tabata basta bou influencia. Na momento cu Polis a bay atende cu e homber, el a cuminsa resisti. Polis a papia cune p'e comporta su mes, pero mirando cu e homber no kier a sigui ordo di Polis, no a keda e Polisnan nada otro, cu pa su mesun seguridad y di otro, pa hibe Warda caminda el a haya un cuarto p'e sosega su curpa.

Parlamentario Shailiny Tromp-Lee (MEP) cu palabra di danki pa Kapel di Alto Vista



Shailiny Tromp-Lee (MEP) a enfatisa con contento e ta cu parti di un proyecto cu el a presenta na Minister Dangui Oduber y ex Minister Otmar Oduber a bira realidad.

Segun Tromp-Lee ya a duna atencion parcialmente n'e molester di stof dor di e desaroyo turistico pa loke ta trata diferente 'tour styles' di awendia manera UTV's y Off Road tours.

A pone piedranan grandi pa preveni pasada rond di e misa, a basha asphalt pa minimalisa e molester di stof y e efecto riba e mantencion y cuido di nos Kapel. A percura pa renobacion y modernisacion di e postenan di oración.

STRUCTURA E INFRASTRUCTURA ROND KAPEL DI ALTO VISTA

Parlamentario Tromp-Lee ta indica cu falta awor e parti di estructuracion di e infraestructura rond y dilanti e kapel. Y sigur e parti mas esencial, cual ta pa bin cu un maneho pa por garantiza cu nos Kapel di Alto Vista ta keda un lugar caminda nos por resa trankil y haya pas interno.

Un maneho cu mester percura cu Kapel ta keda un lugar caminda semper respet ta keda demostra (vestuario, comportacion y actitud) y cu na tur momento ta salvaguardia e motibo pakico e Kapel t'asina importante pa mayoria di nos hendenan.

Den palabra di Tromp-Lee: 'Cu e ta un lugar turistico, ta berdad, pero na prome lugar e Kapel ta un lugar di oracion y pa hopi un lugar unda nan ta bay pa haya trankilidad, pas interno y por resa y gradici Mama María y nos dushi Niño Hesus'.

Tromp-Lee ta finalisa dunando un danki di curason na Minister Dangui, ex-Minister Otmar Oduber, Hose Figaroa y Robert Jeandor cu t'e beheerder nan di Kapel y Pastor Santiago di Noord.

Tromp-Lee a reuni cu nan tur, plantia e proyecto y e ta indica cu hunto nan ta logrando pa salvaguardia nos Kapel di Alto Vista. Nos no ta cla ainda, pero nos lo sigui traha riba dje.

Atan Lee ta splica

Pakico Aruba mester reza, pero hopi



HOPI hende no ta comprende e gravedad di Coronavirus. Hasta hendenan bon studia, politico ta argumenta cumi cu mi ta tumando e virus mucho na serio, mientras cu tin otro virus cu ta mata mas hende anualmente, manera influenza. Berdad cu tin hopi otro virus mas peligroso, pero Coronavirus ta cabando cu e economia mundial. Bolsa di balor ta sigui cai, companianan di aviacion ta batiendo bancarota, companianan di barconan crucero ta perdiendo un cantidad di placa.

Eventonan grandi den diferente pais na unda ya el a yega ta stop esakinan. Skol, Universidadnan ta ser sera. Rumanan como ser humano, naci 73 aña pasa nunca mi a pasa den un enfermedad, un virus cu ta causando tanto daño na mundo henter. Merca a aproba biyones pa cientifonan haci estudio con pa para e virus. Aki na Aruba papiando cu algun persona cu tin posicion importante den hotelnan ta bisami, cu ya tin diferente cancelacion ta drentando diariamente, no pasobra Aruba tin un caso, pasobra hendenan tin miedo di biaha den avion y barco.

Cuanto Arubiano mes cu tabatin plannan traha pa biaha a cancela esaki, debi n'e virus. Ken tin gana di bay den cuarentena pa mas di un luna largo, menera ta sosode cu un hotel na Tenerife, 900 turista sera pa simannan, un barco dilanti na Japon cu turistanan pa dianan sera. Esaki no ta wega rumannan. Italia den apenas 3 siman a perde 80% di su turismo, Merca ta tumando pasonan severo y un control severo pa evita mas contagio.

Na Hulanda den un par di dia e cantidad a subi considerablemente, cu consecuencianan cu hopi actividad grandi, manera e Euro Songfestival lo ser cancela etc.

Mi por keda menciona mas ehempel, loke boso mes ta lesa o mira den noticianan.

Kico esaki lo nifica pa nos pais o ta nificando caba? Un caida grandi di nos economia, nos entrada ta bin di turismo practicamente, Invoerrechten ora cu productonan ta drenta Aruba y belastingnan cu mester ser paga. Cuanto barco cu productonan ta drentando nos pais y asina paga Invoerrechten?

Si no tin benta Gobierno no ta ricibi belasting, ATA no ta ricibi entrada etc. Stop di pensa riba e virus como tal, pensa kico e ta causando mundo **ECONOMICAMENTE**.

Gobierno tin un seguro, manera otro paisnan, pa si algo pasa sigui paga su debenan, paga empleadonan, esnan cu ta cobra pension?

Coronavirus t'e virus, manera World Health Organizations a catolgu'e t'e enemigo number uno di e ser humano.

Ken ta yama pueblo pa oracion, ami so, unda cleronan a keda, unda politiconan a keda, unda instancianan profesional a keda?

Mi rumannan stima ami si ta sigui pidi boso pa sigui reza hunto cumi, pasobra si turismo cai Adios Aruba, ni producto suficiente nos tin. Oracion ta nos unico salvacion.

Mi ta spera cu den tur misa e siman aki, lo reza pa scapa nos pais y tambe tur pais di mundo, Pa bin un remedy pa cura e virus aki.

Gobierno y Obispado mester organisa un Dia Nacional di Oracion pa pidi Señor pa ilumina e científiconan pa haya un remedi pa combati e virus aki.

Carta habri di Aruban Warriors na Minister di Husticia

Distinguido Excelencia,

E efectonan negativo di ilegalidad na Aruba ta conoci. Entre otro ilegalidad ta trece un riesgo cu ne p'e Seguridad Nacional. Y n'e momento ki e pueblo tin cu carga cu tur e gastonan di ekipo, helicopter, boto, auto pa Polis, personal di Polis y Warda Nos Costa, hospital, educacion, detencion y deportacion etc.

Ilegalidad ta expande e chens riba traficacion/explotacion y ta trece competencia inhusto pa trahadornan/negoshinan legal.

Ademas n'e momentonan ki no por lubida cu e chens cu e Corona Virus COVID-19 lo drenta y plama na Aruba ta bira mas grandi na medida cu e cantidad di personanan ilegal na Aruba subi ya cu lo no tin bista riba personanan ilegal infecta y no lo por pone e personan ilegal infecta den cuarentena (na tempo). Y tur esaki teniendo na cuenta e capacidad limita di nos hospital y centro medico.

Den siglo 17 tempo di e pandemia di e peste preto na Europa, gobernacion di Hulanda a logra di contene e pandemia dor di cera tur e fronteranan di lama y tera di Hulanda.

Den caso di e prome caso di coronavirus COVID-19 tambe nos ta pidi, pa proteccion di un y tur y specialmente esnan

mas vulnerabel cu condicionnan medico pre-existente, pa cera tur frontera di Aruba te ora cu a logra di contene e virus exitosamente.

Banco Central di Aruba pa medio di su informe di 2002: "Aruba: Causes and effects of excessive immigration" skirbi pa drs. Jorge R. Ridderstaat, a recomenda cu e hecho cu ilegalidad no ta paga na Aruba mester wordo enfatisa mas ainda pa desanima y descurasha e stranheronan di drenta den e circuito ilegal.

Anos ta di opinion sinembargo cu e hecho aki nunca a wordo enfatisa mirando cu entretanto segun publicacionan den prensa tin 15 mil persona ilegal na Aruba. Alabes tumando den consideracion cu probablemente ningun boet a wordo duna n'esnan cu ta emplea personanan ilegal.

Ta necesario pa cuida y vigila e costanan di Aruba. Sinembargo e acto aki so lo ta manera carga awa pa lama si no castiga e organisacionnan/personanan local cu ta ofrece ayudo na ilegal a cambio di fabor of placa. Y esnan cu ta explota ilegal.

Pues tin di cuminsa actua por directo contra tur e anti socialnan cu pa beneficio propio ta causa daño na Aruba dor di ofrece ayudo na ilegal of ta emplea personanan ilegal.

Nos ta urgi pa laga:

- * Traha un email adres oficial na unda pueblo por manda su melding anonimamente. Cu esaki por registra cantidad di melding y cifranan cu cual por adapta e maneho.
- * Manda e email adres oficial ki pa nos email adres na arubanwarriors@gmail.com
- * Duna tur esnan cu ta contribui cu ilegalidad, yuda, huur appartement/huur kamer den cas di pueblo (subsidia) na ilegal etc un boet di e di 4 categoria conforme articulo 2:154 inciso b di eCodigo Penal di Aruba. Corda cu por gara ilegal pafor di e cas.
- * Duna tur esnan cu ta emplea ilegal un boet di e di 3 categoria conforme articulo 2:155 inciso 1 di eCodigo Penal di Aruba.
- * Duna tur esnan cu ta haci un ofishi of custumber di emplea ilegal un boet di e di 4 categoria conforme articulo 2:155 inciso 2 di eCodigo Penal di Aruba
- * Saca un lista den corant regularmente (p.e. 1x pa siman) di e nombernan di e negoshinan unda a gara ilegal y e sumanan di e boetnan duna na cada negoshi.
- * Tene esun cu a firma pa para garantia pa tur gasto di pais Aruba responsabel pa tur e gastonan pa pais Aruba incluyendo deportacion en caso e temporada di estadia di e turista a caduca.

Nos lo concede su excelencia Minister di Husticia sr. mr. Andin Bikker un periodo rasonabel di maximo tres siman pa mail nos un contesta na arubanwarriors@gmail.com. Si tres siman despues di publicacion di e carta aki den medionan di comunicacion, nos no a ricibi un contesta di su excelencia, nos lo asumi cu no ta duna importancia na nos peticion.

Y si pa un of otro motibo no por of no kier otorga nos nos peticion nos lo studia cua lo t'e siguiente pasonan cu nos lo tuma mirando e urgencia di nos preocupacion pa cu nos tera Aruba y p'e Arubianonan.

Atentamente,
Aruban Warriors

Famia inconsolabel, despues di e perde tur cos den candela di cas



DIADOMINGO madruga Bombero y Polis a sali direccion Rooi Kochi unda lo tabatin un cas na candela. Na yegada di prome unidad di Brandweer, nan ta topa cu un cas completamente domina pa vlamnan. Esaki tabata motibo suficiente pa mesora baha slangnan y cuminsa na combati e candela. Mientrastanto Polis tambe a yega y un unidad mas di Bombero, pa yuda cu awa.

Segun nos a compronde n'e adres tin dos persona ta biba, pero e momento ey nan lo no tabata na cas. Habitantenan a wordo lanta dor di holor di huma y zonidonan di cos cu lo tabata kibra.

Bomberonan mes a kita fuse di e cas, p'asina evita desgracia. Slachtofferhulp a wordo poni na altura pa asisti e famia, despues di e incidente sumamente lamentabel aki unda e famia a perde tur cos.



Rest In Peace

Royal Aurora Funeral Home & Crematory

Mi no a muritap'esey mi no a bisa ayo
Mi a djishabri mi halanan y bula bay
Boso a kedaatras pero no laga tristeza domina boso
Kedaunico otro, esey lo ta un alegriapa mi alma
Recordamicu hopi amor
Cu inmenso dolor na nos curason, nos ta anuncia fayecimento
di mi casa, nos tata, yiu, ruman, sobрино, primo.



Jeanrald Nayron Geerman
*7 mei 1990 - †4 maart 2020

Nanomber di
Su casa: sra. Catherine Geerman- Meston
Su yiu: Jaxson Geerman
Jolyne Geerman
Su mama: sra. Marilyn y Franklin Peñafiel- Geerman
Su tata: sr. Silvester Tromp y familia
Su rumannan: Jarzinho Geerman y
Lucy-Anna Wouters na Hulanda
Jairy Peñafiel, Jazlyn Peñafiel
Su tantanan: sra. Clarina Geerman
sra. Mirella y Tino Kelly-Geermann na Hulanda
sra. Suzette Geerman
sra. Mervine Geerman
sra. vda. Carmen Loefstop-Tromp y familia
sra. Bernadeta Wever-Tromp y familia
sra. Coleta Werleman-Tromp
sra. Visia Tromp y familia na Hulanda
sra. vda. Suzita Franken y familia
Su omo: sr. Casper Tromp y familia na Hulanda
Su primo y primanan: Joshua Hart na Hulanda
Michelle, Melany, Cheryl y Janella Kelly na Hulanda
Cyanne y Hayleigh Tromp
Darrin, Robin Wever na Hulanda y Justin Wever
Y demas primo y primanan
Su suegra: sra. vda. Patricia Mestonna Merca
Su swan: sr. Jessie Meston y familia Merca
sr. Owen Meston y familia Merca
Su welo y wela:
†sr. Mario y †sra. Lica Geerman- Thiel
Su bon bisiña:
Sr. Hubert y Angelie Geerman y familia
sr. Techy y Anna Maria Briesen y familia
Su madrina: sra. Clarina Geerman
Su padrinonan: sr. Tirso Deluvia
sr. Rudolfo Briesen
Su nana di infancia: sra. vda. Nancy Blanco
Su tanta y omonangrandi:
sra. vda. Nanachi Geerman y familia
sra. vda. Lena Geerman y familia
sra. vda. Fabia Geerman y familia
sra. vda. Maria Geerman y familia
sr. Dichi y Marina Thiel y familia
sr. Freddy Thiel
Su bon amigonan: John Paesch, Brian Paesch, Josrey Ridder-
staat, Xavier Viaña, Eugène Pietersz y demas amigonan na Aruba
y Merca
Geerman, Meston, Peñafiel, Tromp, Thiel, Hart, Kelly, Wever,
Werleman, Danje, Dania, Rasmijn, Wouters, Deluvia, Maduro, de
Zwart, Figaroa, Croes, Britten, Giel, Henriquez, Martinez.

Ta invita tur amigo, bisiña y conocirnan pa asistina acto di
entierocu al tuma lugar diamars 10 di maart 2020, for di 1:30 te
4or di atardina misa Inmaculada Concepcion na Santa Cruz y
despues lo salipa Santana Catolico Santa Maria.

Adres pa condolencia: Paradera 92-A, diadomingo, 8 di maart
2020 di 7or pa 9or di anochi.

Royal Aurora Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur bunitesa.
Cado Wever.

A fayece cristianamente mi Casa, nos Mama, Wela,
Bisawela, Ruman y Tanta stima:




Sra. Magdalena Tromp-Luydens
Mihor conoci como "Leen"
*13-10-1938 - †03-03-2020

Na nomber di su:
Casa: Sylvester "Chamito" Tromp
Yiu: Marlene Tromp
Jeanine Tromp y Kees Hoek na Hulanda
Gregory Tromp y Edymarin Josefa
Rumannan: Rosalinda "Lily" Luydens
Maria "Ija" Luydens
†Pedro Luydens y Marina Luydens-Giel
Camilio "Milo" y Mariska Luydens-Tromp
Unico Tanta: Jesusita Franken-Luydens
Nieta(o)nan: Hiram y Emmi Tromp y yiu Candice,
Mkenzie, Cypher, Rebecca Wang, Chris Kelly Wang y
yiunan Gillano, Quinten y Vienna, Marley Wang,
Jennifer Wang y Justin Hogendijk y yiunan Desteny y
Jurraily, Rosalinda Wang y yiu Jaden, Jeremy Wang,
Brandon Tromp, Michelle Tromp y yiu
Sobrina(o)nan: Mary y Robby Geerman y yiu, Rafy y
Jasmine Jacoppuci y yiunan, Sergio y Milenne Luydens,
Luis Luydens
Swa-y Cuñanan: Vda. Rosalinda "Rosa" Helder-Tromp y
familia
†Bernardo y Fermina y familia
Jesusita "Chita" Tromp na Hulanda
Hose "Djo" y Rose Tromp-Nisbet
Filomena "Mena" Tromp y familia
Vda. Bearatrix "Truus" Geo-Tromp y familia
Lydia y Bert Radings y familia na Hulanda
†Mario y Tina Tromp-vd Biezen y familia
Mercedes "Chedi" y Nagib Elhage-Tromp y familia
Ovito "Ovi" Tromp
Magda Tromp y familia
Amiganan di cas Eveline Bronswinkel
Ex colega nan di Gonzales y Frasa Trading
Demas familia: Luydens, Tromp, Giel, Franken, Geerman,
Gomez, Bermudez, Eckmeyer, Frans, Sanches, Alvarado,
Semerel, Semeleer, Helder, Nisbet, Hayer, G
eo, Radings, vd Biezen, Elhage, Perigaut Monte y demas
familiaresnan, bisiñanan
Ta invita pa acto di entierocu al tuma lugar diaranson
11 di maart 2020 na Misa Sta Anna na Noord di 9'or pa
11'or di mainta. Despues lo sali pa Santana Catolico na
Noord.
Condolencia lo tuma lugar na Aurora Funeral Home
diamars 10 di maart 2020 di 7'or pa 9'or di anochi.
Disculpa nos si den nos tristesa nos por a lubida algun
familia of conocir.

Royal Aurora Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta pone mi sosega.
E ta hiba mi na awa trankil,
Pa mi bolbehañaforsa".
Salmo: 23

Cu honda pena pero conforme cu Dios su boluntad
nos ta anuncia fayecimento di :



Julio Tromp
Mihorconoci como: "PapaJuchi of Juchi"
*22-05-1939- †03-03-2020

Na nomber di su:
Casa: †Carmen Delia Tromp-Jones
Yiu: Julio Cesar y lieying Li-Tromp na Hulanda
Rudi y Evelinda Tromp
Judith y Uriel Tamayo-Tromp
Rocio y Wolter Britten-Tromp
Manerayiu: Gloria van der Dijs-Figaroa
Nieta(a)nan:
Carmen Delia, Julio, Danilo Tromp na Hulanda
Jasmine, Rushella, Rudsinnny, Joan-Nina Tromp
Juliska, Bryan, Kimberly, Joanne Britten
Tur subisanieta(a)nan na Aruba y Hulanda
Mescosnieta: Shaswin Tromp, Dyandra Albertus,
Santino y Gabriel van der Dijs
Rumannan: Domi y Yvonne Tromp
†Jossy Tromp
Vda. Bertha Tromp
Eddy y Fortunata Tromp
Vdo. Joon Tromp
†Nikky y Nelly Tromp
Regina Tromp
Martin Tromp
Miguel y Ada Tromp
Deta Tromp
Sobrina(a)nan: Marisol Lopez-Tromp y familia, Lelicia Tromp,
Jamil Tromp y familia, Edward Tromp y familia, Selin Croes-Tromp
y familia, Elaine Tromp, Dolfi Tromp y familia, Linda Gei-Tromp y
familia, Raiza Tromp y familia na Hulanda, Omar Tromp y familia,
Luis Tromp, Rachelle Tromp y familia, Milangela Tromp, Gina
Baars y familia na Hulanda, Rishella Brete y familia, Mary-ann Brete

Su bon bisiñanan: vda. Carmensita Ruiz, Rogelio Lopez, Rosa
Suarez, Teresita Erasmus, vda. Mia Guerrero

Prima y primonan, comer y compernan, Grupo Flor di Bini Bini,
Ex empleadonan d Web Aruba NV, tur suamigonan y conocir-
nan di Hot Corner (Skina Cayente), Café 080 y demas familia y tur
suihanan y familia

Nos disculpasi den nos tristeza nos por a lubida un of otro familia

Demas familia: Tromp, Jones, Britten, Tamayo, Li, Semeleer,
Figaroa, Webb, van der Dijs, Lopez, Brete, Gei, Jacobs, Wolff,
Ruiz, Trimon, Williams, Frank, Frans, Farro, Baez, Zimmerman,
Bonarriba, D'Aguire, Croes, Albertus Dijkhoff

Oportunidad pa condolencia: Aurora Funeral Home, dialuna 9
di maart 2020 di 7'or pa 9'or di anochi.

Ta invita pa acto di entierocu lo tuma lugar diamars 10 di maart
2020 namisa Santa Anna na Noord di 2'or pa 4'or di atardi
, despues saliendop Santana catolicono Noord.
Lo tin un box pa donacionna Wit Gele Kruis

Alerta pa flinan den área di Aeropuerto cu ta forma peligro

WILLEMSTAD - Cu cierto regularidad Central di Polis ta ricibiendo último dianan notificacion di flinan cu ta wòrdo subi na alturanan exageradamente halto den área di Aeropuerto.

E situacion aki ta uno cu cada aña di nobo Polis ta hala atencion di ciudadanonan y particularmente hóbennan riba dje, pero e ta keda tuma lugar.

Subimento di fli den área di Aeropuerto ta percura pa dificultad y por peligrá traficacion aéreo na momento cu un avion ta asercando pista di aterisahe òf nèt na momentu cu un aeroplano a caba di lanta buelo.

Un biaha mas Polis kier alerta cu conforme artículo 41 inciso 2 bou di a di e ordenansa cu ta regla òrdo público (L.O.O.), no ta permití pa subi fli riba un distancia di ménos cu 3 kilometer for di e waya di tereno di Aeropuerto.

Tampoco segun e ley aki, bou di respectivamente c y d di e mesun artículo 41 inciso 2, ta permití pa subi òf tin un fli den laira durante di bahada y subida di solo y di cua e liña cu ta for di e fli cuné, ta mas largo cu 100 meter.



WILLEMSTAD - Diabièrnè 6 di maart 2020, alrededor di 06.00 or di mainta, personal di Division di Crímen Organisá den cooperacion cu Team di Aresto, Marina y KMAR a tene entrada hudicial riba un tereno situa na Ronde Klip.

E entrada hudicial ta den cuadro di informacion relacioná cu plantacion di marihuana.

Durante di e investigacion riba e tereno mencioná a haña y confiscá un cantidad di planchi di marihuana, diferente atributo pa cultivo y un cantidad di municion. No a encontra cu ningun hende den becindario di e plantacion. Investigacion den e caso aki ta continuá

**Royal
Aurora**
Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta pone mi sosega.
E ta hiba mi na awa trankil,
Pa mi bolbe haña forsa".
Salmo: 23

Nos ta anuncia fayecimento di:



Pedro Figaroa

*19-05-1955 - †06-03-2020

Acto di entierro lo wordo anuncia despues.



E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL